

Evian, ils 18 da mars 1962

Fin da la guerra algeriana

DA GUIU SOBIELA-CAANITZ

Ils 18 da mars 1962 ad Evian-les-Bains, sin la riva saviarda dal Lai da Genevra, han represchentants da la Frantscha e da la Front da liberaziun naziunalala algeriana (fln) firmà ina cunvegna d'armistizi: «Il sera mis fin aux opérations militaires et à la lutte armée sur l'ensemble du territoire algérien le 19 mars, à 12 heures» (1). Ils cumbats eran a fin, ma ins ha anc mazacrà deschmillis umans en Algeria durant la stad e l'atun da 1962; las unfrendas eran cunzunt anteriurs schuldads algerians da l'armada franzosa («harkis»). Il 1. da fanadur han 6 millions votantas e votants en Algeria vuschè per l'indipendenza dal pajais, renconuschida ils 3 da la Frantscha. La cunvegna ha manà la pasch ad omadus pajais. Era la Svizra ha pudì trair il flad; ella aveva gidà a moda decisiva a promover il dialog tranter Paris ed ils cumbattants. Ils Documents diplomatics svizzers (DDS; dds@dodis.ch, www.dodis.ch) han gist elavurà ina documentaziun davart lezza ovra da pasch. Uschia pon ins far endament quai che la Svizra ha vivì e prestà dal 1962 per la fin da la guerra algeriana.

Loschar e proteger ils emissaris

Ils 5 da mars 2012 han ils DDS derasà ina communicaziun a las medias, firma da dal manader Scha Zala e dal cusse-gliader Marc Perrenoud ed entitulada: «50 onns cunvegna d'Evian e fin da la guerra en Algeria». L'entschatta dal text pon ins translatar sco suonda: «Suenter otg onns è la guerra sanguinusa tranter la Frantscha e l'Algeria ida a fin cun l'indipendenza da questa (...). La Svizra ha gidà a moda decisiva tar questa conclusiun paschaivla cun il contract d'armistizi suttascrit ad Evian avant tschin-quanta onns, ils 18 da mars 1962. Svizras e Svizzers eran involvids en la guerra dapi l'entschatta, saja quai tar gasettas, chasas edituras u gruppas d'acziun, per

infurmà davart la situaziun en l'inteschess da guerra, gidar fugitivs algerians u deserturs franzos (...). La Frantscha e [la regenza provisoria da] l'Algeria han supplitgà la Svizra da far da mediatura. Cuss. fed. Max Petitpierre, chef dal departament politic (oz departament dals affars exteiurs), è sa declerà pront d'exequir quella incumbensa en armonia cun la 'neutralitat activa' ch'el propagava. 1961 e 1962 ha il diplomat svizzer Olivier Long arranschà tractativas secretas tranter las partidas en differents lieus dal pajais. Durant las tractativas uffizialas ad Evian era la delegaziun algeriana loschada sper Genevra e lura a Signal de Bougy (VD); las autoritads svizras avevan quità da lur segirtad, da lur transport al lieu da sentupada e da la 'discreziun absoluta'. Las regenzas d'omadus partidas han ludà expressamain la lavour svizra da mediatura.» Ils DDS han publitgà plis documents da 1962, cunzunt in rapport dals 11 da matg elavurà dal diplomat svizzer Raymond Probst (1919–2001; dodis.ch/10397): «Durant l'enviern passà avain nus ans declarads pronts da possibilizar puspè contacts secrets tranter emissaris franzos ed algerians. Sco lieu da lezs contacts avain nus tschernì Les Rousses, lieu franzos da sport d'enviern sper il cunfin svizzer da Saint-Cergue/VD. Durant quella prima fasa da las discussiuns novas han las autoritads svizras surpiglià da dar tetg als emissaris algerians senza che pressa e publicitat als percorschian (...). Ins ha pudi manar lezza incumbensa a buna fin. Funcziunaris da la polizia federala, dal departament militar (sutuffiziers d'istrucziun da las truppas motorisadas sco autists) e dal departament politic han già quità da la segirtad, dal transport e da la discreziun absoluta. Ins stueva cunzunt dar tetg als otg delegads algerians, metter ad ir lur scuntradas cun ils represchentants franzos ed als manar mintga di a Les Rousses. La pressa estra ha in-

saco savrà l'aura ed arranschà ina persécuziun sistematica che, dals 10 als 19 da favrer, ha obligà quatter giadas da midar l'albiert dals emissaris. Grazia a mesiras inschignusas han ins pudì realisar las sentupadas senza vegnir fastizà. Las duas delegaziuns han pudì analisar cun calma ils puncs principals da l'armistizi.»

Giasts cunents ed engraziaivels

Probst rapporta lura da la fasa uffiziala da las tractativas, dals 7 als 18 da mars ad Evian-les-Bains: «Nus avain puspè dà tetg en Svizra a la delegaziun algeriana (...). La terrur [naziunalistica franzosa] da l'Organisaziun da l'armada secreta (OAS), adina pli violenta, avess pudi operar er en Svizra. Nus avain pia stuì proteger la delegaziun algeriana a moda efficazia, (...) dond tetg a la delegaziun en il pitschen hotel dal Signal de Bougy pervi da sia situaziun favraiva. Nus avain prendi amplas mesiras preventivas, cun in battagliu d'infantaria, defensiun cunter aviuns, contingents da la polizia vadaisa da segirezza e da la schandarmaria vadaisa. Ins ha rinforzà la surveglianza dal cunfin e dal sectur dal Lai da Genevra. Per regla manav'ins ils delegads algerians ad Evian ed enavos en helicopters militars. M'intgatant han ins dentant stuì duvrar bartgas u autos. Ins ha garantì collazioni directas per telex e telefon tranter la delegaziun algeriana e sia regenza provisoria a Tunis, indispensablas per il progress da las tractativas. La cuntrapart algeriana en las tractativas aveva subordinà lur conclusiun a la relaschada dal chef fln Ben Bella e da ses quatter cumpongs; la Frantscha als aveva rapinads 5½ onns pli baud (...). Lezza als ha pia manads en Svizra che als ha dà tetg al Signal de Bougy durant insaquants dis (...). Ella ha insumma stgaffi las premissas exteiuras per concluder las tractativas d'armistizi. Domadus varts ans han express lur sincera renconu-

schientscha cun ils messagis uffizials dal minister franzos da l'exterior Couve de Murville [1907–1999] e dal president da la regenza provisoria algeriana Ben Khedda [1920–2003]. Er ils chefs e commembers d'omadus delegaziuns ans han engrazià spontanamain.» Gia ils 21 da mars 1962 ha il diplomat svizzer Olivier Long (1915–2003) rapportà (dodis.ch/10392): «Ils 20 da mars a las 19 al Signal de Bougy hai dà adia a noss giasts algerians (...). L'emprim m'ha Ben Bella supplitgà da drizzar or a las autoritads federalas l'expressiun da sia profunda renconuschientscha per l'ospitalitat svizra (...). El ha punctuà ch'el haja giavischà expressamain da passentar en Svizra ses emprims dis da libertad. Lura m'ha [il chef da la delegaziun algeriana] Belkacem Krim, sinceramain commovì, engrazià per tut quai che la Svizra aveva prestà per possibilizar la conclusiun da tractativas ordvart grevas e per facilitar la fin dals cumbats en Algeria. El ha ditg ch'el saja ventiraivel e tuttafatg cuntenet da tut las mesiras prendidas en Svizra a regard la segirtad, l'alloschi ed ils viadis (...). La finala ha'l exprimì sia profunda renconuschientscha vers las autoritads ed il pievel svizzer.»

La Frantscha turna en Europa

Ils 8 d'avrigl han passa 90% da votantas e votants en Frantscha approvà la cunvegna d'armistizi, pia er il dretg d'autodeterminaziun dal pievel algerian. Ma l'opposiziun naziunalistica «per l'Algeria franzosa» ha s'organisada. A Roma ha l'OAS fundà il «Cussegli naziunal da resistenza», presidià dal politicher Georges Bidault (1899–1983), cun colonel Antoine Argoud (1914–2004). Ins temeva acziuns terroristicas da l'OAS er en Svizra; quai era strusch surfatg, sch'ins fa endament l'attentat dals 22 d'avust 1962 encunter president Charles de Gaulle (1890–1970). Ils 10 da matg ha cuss. naz. Georges Borel (1900–1975, GE)

fatg attent en scrit il departament politic al privel da l'OAS. Ils 12 ha Raymond Probst scrit «per las sesidas da las cummissiuns da politica extiera» (dodis.ch/10398): «Organisaziuns terroristicas han rinforzà lur activitat cunter las stentas franzosas ed algerianas per cuntanscher in armistizi. Quai ha incità la polizia federala a scumandar l'entrada en Svizra da blers 'ultras' enconuschents; (...) oz vala in tal scumond per var 120 extremists franzos da la dretga (...). Ins ha constatà che Georges Bidault, anteriu minister franzos da l'exterior, (...) aveva passentà dus u traís dis en Svizra. Plinavant ha ina retschertga mussà che colonel Argoud da l'OAS era stà plis dis a Genevra sut in num fauss; cunter el vala daditg in scumond d'entrar en Svizra (...). Dus Frantz, suspectads da far part da l'OAS, èn en fermanza a Basilea; ussa fan ins retschertgas cunter els.» Pir dus onns pli tard, ils 15 d'avust 1964, han ins scuvert en Frantscha il davos plan d'attentat naziunalistic cunter de Gaulle. L'indipendenza algeriana ha mess fin als siemis franzos d'in imperi colonial d'ultramare. Plaun a plaun è la Frantscha turizada spiertalmain en Europa. Ses domini d'antruras viva mo pli en l'Organisaziun internaziunala da la francofonía (OIF) cun 56 stadis commembers, t. a. anteriuas colonias da la Frantscha. La Svizra fa part da l'OIF dapi 1989 ed è sia presidenta dapi la dieta da Montreux 2010, enfin a la dieta da Kinshasa (Congo) en october 2012. «L'ideal d'ina cumanza europeica ch'ins duaja construir sin ils bajtgs tradiziunals dals vegls stadis e da las veglias naziuns vegn forsa a sveglier en ses senn las vastas speranzas naschidas antruras da la construcziun da l'imperi colonial» (2).

1. Cità en: Benjamin Stora, *La gangrène et l'oubli. La mémoire de la guerre d'Algérie*. Paris (Editions La Découverte, ISBN 2-7071-2072-3) 1991, p. 114.

2. Raoul Girardet, *L'idée coloniale en France de 1871 à 1962*. Edizion tastgabla. Paris (Pluriel. Le Livre de poche) 1978, p. 412.